



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu 2014
Tribunál Distritál Suai
Juñu 2014

Sumáriu prosesu julgamentu kazu iha Tribunál Distritál Suai
Periódú Juñu 2014

Intródusaun

Iha Juñu 2014, JSMP kontinua hala'o atividade monitorizasaun iha Tribunál Distritál Suai monitoriza kazu 25 hosi maizumenus totál kazu 32 ne'ebé julga iha tribunál refere. Ne'e inklui kazu sira ne'ebé julga através hosi julgamentu móvel iha Distritu Ainaro.

Kazu 25 ne'e klasifika ba kazu krime hotu hanesan krime ofensa ba integridade fízika simples 5, furtu agravadu 2, violasaun seksuál 2, abuzu seksuál ba menóridade 2, expozisaun ka abandonu 2, inséndiu 2, koasaun seksuál 1, tentativa violasaun seksuál 1, infantisídiu 1, ofensa ba integridade fízika simples ho natureza violénsia doméstika 1, omisídiu negligente 1, falsifikasaun dokumentus 1, furtu simples 1, ofensa ba integridade fízika grave 1, danu agravadu 1 no pekulatu 1.

Husi total kazu hirak ne'e, kazu 11 mak tribunál konklui nia prosesu no kazu hamutuk 14 mak sei iha prosesu laran. Kazu sira ne'e maioria konklui ho omolagasaun tanba parte sira konkorda atu dada fali sira nia kazu. Balun konkorda atu rezolve tuir kustumi ka adat no balun arguidu promote atu selu indenmizasaun ba vítima tanba prejuizu ne'ebé rezulta hosi arguidu sira nia hahalok.

Tuir mai deskrisaun sumáriu julgamentu kazu kompletu :

1. Kazu krime furtu agravadu - Nú. 230/pen/2013/TDS

Kompozisaun Tribunál	: Koletivu
Juis	: Dr. Alvaro Maria Freitas, Dr. Costâncio Basmeria, no Dr. Argentino Luisa Nunes
Ministériu Públiku	: Dra. Benvinda da Costa Rosario
Defeza	: Dr. João Henrique de Carvalho
Konkluzaan	: Kondena ho pena prizaun tinan 3 suspende ba tinan 3

Iha 04 Juñu 2014, Tribunál Distritál Suai prezide leitura akordaun ba kazu krime furtu agravadu no ne'ebé involve arguidu CLdJ ho DGM no kondena ida-idak ho pena prizaun tinan 3 suspende ba tinan 3. Tribunál prova arguidu na'in rua prátika krime furtu agravadu hasoru AP ne'ebé hanesan lezadu, iha 19 Abril 2012, iha Distritu Suai.

Antes ne'e, ministériu públiku akuza katak iha 19 Abril 2012, arguidu sira tama ba iha lezadu nia armajen hodi foti motor ida ho marka Honda Win. Motor refere arguidu sira foti no lori ba subar tiha iha arguidu CLdJ nia uma laran.

Ministériu Públiku akuza arguidu sira kontra artigu 252 Kódigu Penál kona-ba krime furtu agravadu ho moldura penal tinan 2 to'o tinan 8 prizaun.

Iha prosesu julgamentu arguidu sira deklara katak sira komete duni krime ne'e, maibe motor ne'ebé mak sira foti/naok intrega fali ona ba lezadu. Alende ne'e, lezadu konfirma katak arguidu sira intrega fali ona motor refere.

Iha alegasaun finál, ministériu públiku husu ba tribunál atu kondena arguidu na'in rua ho pena prizaun tinan 2 suspende ba tinan 3.

Entretantu, parte defeza husu ba tribunál atu aplika pena ne'ebé justu ba arguidu na'in rua tanba arguidu sira konfesa sira ninia hahalok.

Tribunál konklui kazu ida ne'e hodi kondena arguidu na'in rua ho pena prizaun tinan 3 suspende ba tinan 3 ba kada arguidu inklui kondena mós arguidu sira selu indemnizasaun hamutuk US\$145,00.

2. Kazu krime omisídiu negligente – Nú. Prosesu : 54/pen/2013/TDS

Kompozisaun Tribunál	: Singulár
Juis	: Dra. Florensia Freitas
Ministériu Públiku	: Dr. Antonio da Silva Tavarres
Defeza	: Dr. João Henrique de Carvalho
Konkluzau	: Kondena ho pena prizaun tinan 2 suspende ba tinan 3

Iha 04 Juñu 2014, Tribunál Distritál Suai prezide leitura akordaun no kondena arguidu BBA ho pena prizaun tinan 2 suspende ba tinan 3. Tribunál deskobre katak arguidu provadu komete duni krime omisídiu negligente hasoru MN (matebian), iha 25 Feveireiru 2012, iha Distritu Suai.

Ministériu Públiku akuza katak iha 25 Feveireiru 2012, arguidu konduz motor Honda Revo ho velocidade makas. Wainhira too iha rai lolon, arguidu soke lezadu ne'ebé lao hasoru motor no rezulta lezadu mate kedas iha fatin akontesimentu.

Ministériu Públiku akuza arguidu kontra artigu 140 Kódigu Penál kona-ba omisídiu negligente konjugadu ho artigu 207 Kódigu Penál kona-ba kondusaun sein karta.

Antes ne'e, iha prosesu julgamentu, arguidu rekoñese ninia hahalok no deklara ba tribunál katak nia selu ona osan hamutuk US\$6,7450 ba família matebian hodi ajuda serimónia funeral ninian.

Iha alegasaun finál, ministériu públiku husu ba tribunál atu kondena arguidu ho pena suspensaun inklui bandu arguidu atu la bele konduz motor durante tinan 3.

Entretantu, defeza husu ba tribunál atu aplika pena ne'ebé justu no adekuaudu ba arguidu tanba arguidu konfesa no ajuda ona osan ba seremónia funeral ba matebian.

Bazeia ba prosesu sira ne'e, tribunál konklui kazu ne'e hodi kondena arguidu ho pena prizaun tinan 2 suspende ba tinan 3.

3. Kazu krime furtu agravadu - Nú. Prosesu : 78/pen/2014/TDS

Kompozisaun Tribunál	: Koletivu
Juis	: Dr. Alvaro Maria Freitas, Dr. Costáncio Barros Basmery, Dr. Argentino Luisa Nunes
Ministériu Públiku	: Dra. Benvinda da Costa Rosario
Defeza	: Dr. Manuel Amaral
Konkluzau	: Sei kontinua prosesu

Iha 05 Juñu 2014, Tribunál Distritál Suai adia julgamentu ba kazu furtu agravadu ne'ebé involve arguidu NdJO hasoru ONG HIR ne'ebé fo apoiu ba labarik sira. Kazu ne'e akontese iha Distritu Ainaro.

Tribunál adia prosesu julgamentu ba kazu ne'e tanba arguidu la marka prezensa iha tribunál mesmu hetan ona karta notifikasaun.

Tanba ne'e, tribunál adia fali prosesu julgamentu ba iha 18 Jullu 2014, tuku 09:00 dader.

4. Kazu krime falsifikasaun ba dokumentus - Nú. Prosesu : 07/pen/2012/TDS

Kompozisaun Tribunál	: Koletivu
Juis	: Dra. Florensia Freitas, Dr. Costáncio Barros Basmery, Dr. Argentino Luisa Nunes
Kompozisaun Tribunál	: Singulár
Juis	: Dra. Florensia Freitas
Ministériu Públiku	: Dra. Benvinda da Costa Rosario
Defeza	: Dr. Manuel Amaral (estajiariu)
Konkluzau	: Sei kontinua prosesu

Iha 05 Juñu 2014, Tribunál Distritál Suai dala ida tan adia prosesu julgamentu ba kazu falsifikasaun dokumentus ne'ebé involve arguidu MB hasoru GdJ ne'ebé nu'udar lezadu. Kazu ne'e akontese iha 15 Outubru 2010, iha Distritu Suai.

Tribunál adia prosesu julgamentu tanba lezadu la marka prezensa iha tribunál mesmu lezadu hetan ona karta notifikasaun. Tanba ne'e, tribunál adia prosesu julgamentu ba iha 25 Jullu 2014, tuku 02:30 lorokraik.

5. Kazu krime ofensa ba integridade fízika simples - Nú. Prosesu : 39/pen/2013/TDS

Kompozisaun Tribunál : Singulár
Juis : Dra. Florensia Freitas
Ministériu Públiku : Dra. Benvinda da Costa Rosario
Defeza : Dr. João H. de Carvalho
Konkluzau : Sei kontinua prosesu

Iha 05 Juñu 2014, hanesan mós kazu rua antes, Tribunál Distritál Suai adia prosesu julgamentu ba kazu ofensa integridade fízika simples ne'ebé involve arguidu JMdS hasoru ASdR no ME ne'ebé nu'udar lezadu. Kazu ne'e akontese iha 19 Jullu 2013, iha Distritu Suai.

Tribunál adia prosesu julgamentu tanba lezadu na'in rua la marka prezensa iha tribunál mesmu lezadu sira hetan ona karta notifikasaun. Tribunál decide adia prosesu julgamentu ba iha 18 Jullu 2014, tuku 02:30 lorokraik.

6. Kazu krime furtu simples - Nú. Prosesu : 99/pen/2014/TDS

Kompozisaun Tribunál : Singulár
Juis : Dr. Pedro Rapozo de Figueirido
Ministériu Públiku : Dr. Antonio da Silva Tavares
Defeza : Dr. João H. de Carvalho
Konkluzau : Omologa

Iha 13 Juñu 2014, Tribunál Distritál Suai julga no omologa prosesu ba kazu krime furtu simples ne'ebé involve arguidu AGA hasoru SNA.

Iha tribunal, arguidu deklara katak nia prontu atu selu fila fali prejuizu ne'eb'e SNA hetan. Kazu ne'e akontese iha 29 Setembru 2013, iha Distritu Suai.

Ministériu Públiku katak iha 29 Setembru 2013, arguidu naok no han tiha lezadu nia karau. Relasiona ho aktu ne'e, ministériu públiku akuza arguidu kontra artigu 251 Kódigu Penál kona-ba furtu simples.

Iha prosesu julgamentu arguidu konfesa, arrepende ninia hahalok no prontu atu selu fila fali karau refere ho osan US\$300,00 durante fulan ida nia laran. Nune'e mós lezada fo perdua ba arguidu no konkorda ho promesa arguidu ne'ebé prontu atu selu karau ne'ebé nia han tiha ona. Bazeia ba akordu hosi parte rua, tribunál omologa prosesu ba kazu ne'e.

7. Kazu krime ofensa ba integridade fízika simples - Nú. Prosesu : 107/pen/2014/TDS

Kompozisaun Tribunál : Singulár
Juis : Dr. Pedro Rapozo de Figueirido
Ministériu Públiku : Dr. Antonio da Silva Tavares
Defeza : Dr. João H. de Carvalho
Konkluzau : Omologa

Iha 13 Juñu 2014, Tribunál Distritál Suai hala'o prosesu julgamentu no kontinua kedas ho anunsia desizaun ba kazu ofensa ba integridade fízika simples ne'ebé involve arguidu NMM hasoru AVM hanesan lezadu.

Iha prosesu ne'e lezadau prontu atu dada fila fali kazu no parte rua mós konkorda atu rezolve tuir kustume Timor ninian. Kazu ne'e akontese iha 18 Agostu 2013, iha Distritu Suai.

Antes ne'e, Ministériu Públiku katak iha 18 Agostu 2013, arguidu ne'ebé lanu tuku dala ida iha lezadu nia hasan sorin loos no rezulta lezadu sofre bubu no moras.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples.

Durante prosesu julgamentu arguidu konfesa faktus sira ne'ebé akuza ba nia no deklara katak nia arrepende ninia hahalok.

Tanba lezada no arguidu konkorda atu dada fali kazu ne'e, nune'e, iha alegasaun finál, ministériu públiku husu ba tribunál atu omologa tiha kazu ne'e no defeza konkorda ho alegasaun ministériu públiku nian.

Bazeia ba prosesu ne'e, tribunál konklui no omologa prosesu ba kazu ne'e.

8. Kazu krime ofensa ba integridade fízika simples - Nú. Prosesu : 98/pen/2014/TDS

Kompozisaun Tribunál	: Singulár
Juis	: Dr. Pedro Rapozo de Figueirido
Ministériu Públiku	: Dr. Antonio da Silva Tavarres
Defeza	: Dr. João H de Carvalho
Konkluzau	: Omologa

Iha 13 Juñu 2014, Tribunál Distritál Suai hala'o prosesu julgamentu no omologa kazu ofensa ba integridade fízika simples ne'ebé involve arguidu JdC hasoru EdA, ne'ebé akontese iha 01 Janeiru 2013, iha Distritu Suai.

Tribunál omologa prosesu ne'e bazeia ba akordu entre arguidu no lezadu atu dada fila fali kazu ne'e.

Ministériu Públiku akuza katak iha 01 Janeiru 2013, arguidu lori ai-dona ida baku dala ida iha lezadu nia hasan no rezulta lezadu sofre bubu no moras iha hasan. Kazu ne'e akontese tanba lezadu lori motor hodi halo barullu iha bairo laran.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples.

Iha tribunál, arguidu konfesa ninia hahalok no prontu selu fila fali gastus US\$50,00 ne'ebé lezadu uza hodi sosa aimoruk ba nia kanek. Iha parte seluk, lezadu mós konkorda ho arguidu nia promesa nune'e decide atu dada fali kazu ne'e.

Tanba parte sira konkorda atu dada fali kazu ne'e, ministériu públik no defeza husu ba tribunál omologa prosesu ba kazu ne'e. Bazeia ba alegasaun hosi ministériu públik no defeza, tribunál konklui prosesu ne'e no omolaga kazu refere.

9. Kazu krime ofensa ba integridade fízika simples ho natureza violénsia doméstika - Nú. Prosesu : 120/pen/2014/TDS

Kompozisaun Tribunál	: Singulár
Juis	: Dra. Florensia Freitas
Ministériu Públiku	: Dra. Benvinda da Costa Rosario
Defeza	: Dr. Manuel Amaral (estajiaru)
Konkluzau	: Kondena pena prizaun tinan 3 suspende tinan 3 inklui selu kustus judisiál US\$25,00

Iha 17 Juñu 2014, Tribunál Distritál Suai julga arguidu CM ne'ebé komete krime ofensa ba integridade fízika simples hasoru MdS nu'udar nia feen. Kazu ne'e akontese iha 04 Novembru 2013, iha Distritu Suai.

Ministériu Públiku akuza katak iha 20 Janeiru 2014, maizumenus iha oras tuku 07:00 kalan, arguidu no lezada deskuti malu kona-ba osan veteranu nian ne'ebé arguidu simu kada fulan maibé la fo balun ba lezada. Tanba ne'e, arguidu nervozu hodi basa dala ida iha lezada nia hasan loos, rasta lezada nia fuk to'o lezada monu ba rai. Arguidu kontinua tebe iha lezada nia kotuk laran, les lezada niaibun no kakorok. Aktu hirak ne'e rezulta lezada sofre moras no bubu ihaibun, kotuk laran no kakorok.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 alineaia (b) Lei Kontra Violénsia Doméstika.

Durante prosesu julgamentu arguidu konfesa faktu sira ne'ebé akuza ba nia no deklarata katak arrepende ninia hahalok.

Aleinde ne'e, lezada mós mantein faktus sira ne'ebé deskreve ona iha akuzasaun ministériu públiku nian.

Iha alegasaun finál, ministériu publikú husu ba tribunál atu kondena arguidu ho pena prizaun tinan 1 suspende ba tinan 2 tanba arguidu provadu komete krime ne'ebé ministériu públiku akuza ba nia.

Entretantu, defeza husu tribunál atu kondena arguidu ho pena suspensaun ne'ebé kma'an. Ne'e bazeia ba sirkunstansia atenuantes sira hanesan arguidu ho lezada diak malu ona, sira hela hamutuk nu'udar feen no laen hanesan bai-bain no nunka mosu problema to'o agora.

Iha 18 Juñu 2014, tribunál konklui prosesu ne'e no kondena arguidu ho pena prizaun tinan 3 suspende ba tinan 3 no selu kustus judisiál hamutuk US\$25,00.

10. Kazu krime ofensa ba integridade fízika simples - Nú. Prosesu : 121/pen/2014/TDS

Kompozisaun Tribunál : Singulár
Juis : Dr. Pedro Rapozo de Figueirido
Ministériu Públiku : Dra. Benvinda da Costa Rosario
Defeza : Dr. Manuel Amaral (estajiariu)
Konkluzau : Omologa

Iha 17 Juñu 2014, Tribunál Distritál Suai hala'o prosesu julgamentu no omologa prosesu ba kazu ofensa ba integridade fízika simples ne'ebé involve arguidu TA hasoru AHG, iha 04 Janeiru 2014, iha Distritu Suai.

Ministériu Públiku akuza katak iha 04 Janeiru 2014, arguidu tebe dala rua iha lezadu nia ain no basa dala iha lezadu nia hasan los. Aktu ne'e rezulta lezadu sofre bubu no moras iha hasan no ain.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples.

Iha prosesu julgamentu arguidu konfesa ninia hahalok no deklara prontu atu rejolve kazu ne'e tuir adat. Lezadu konkorda ho proposta atu rezolve kazu ne'e liu hosi adat, nune'e lezadu dada fila fali kazu ida ne'e.

Bazeia ba akordu ne'e tribunál konklui prosesu refere no omologa kazu ne'e.

11. Kazu krime infantisídiu – Nú. Prosesu : 79/pen/2014/TDS

Kompozisaun Tribunál : Koletivu
Juis : Dr. Pedro R. de Figueirido, Dr. Alvaro Maria Freitas,
Dr. Argentino Luisa Nunes
Ministériu Públiku : Dra. Benvinda da Costa do Rosario
Defeza : Dr. Manuel Amaral (estajiariu)
Konkluzau : Sei kontinua prosesu

Iha 25 Juñu 2014, Tribunál Distritál Suai liuhosi julgamentu movel iha Distritu Ainaro julga kazu krime infantisídiu ne'ebé involve arguida AdrG hasoru nia oan rasik- iha 20 Juñu 2013, iha Distritu Suai.

Ministériu Públiku akuza katak iha 20 Juñu 2013, maizumenus iha oras tuku 03:00 madrugada arguida partu tiha nia oan no arguida buti mate tiha bebe ne'e. Kazu ne'e akontese tanba mane ne'ebé fo oan ba nia lakohi atu responsabiliza ba lezada.

Ministériu Públiku akuza arguida kontra artigu 142 Kódigu Penál kona-ba infantisídiu ho moldura penal tinan 3 to'o 10 prizaun.

Iha prosesu julgamentu arguida nega akuzasaun hosi ministériu públiku no deklarata katak nia monu iha natar leten no kauza nia hetan abortus.

Testemuña MG no LdR nu'udar arguida nia inan-aman depoimenta katak sira mak ajuda arguida partus no ajuda mós hakohi bebe ne'e iha dapur laran.

Depois rona tiha deklarasaun hosi arguida no depoimentu hosi testemuña sira, tribunál marka fali ba iha 22 Jullu 2014, tuku 09:00 dader ho agenda alegasaun finál no se posível sei kontinua ho leitura akordaun.

12. Kazu krime koasaun seksuál - Nú. Prosesu : 54/pen/2014/TDS.

Kompozisaun Tribunál	: Koletivu
Juis	: Dra. Florensia Freitas, Dr. Argentino Luisa Nunes, Dr. Pedro R. de Figueiredo
Ministériu Públiku	: Dra. Benvinda da Costa Rosario
Defeza	: Dr. João Henrique de Carvalho
Konkluzau	: Absolve

Iha 25 Juñu 2014, Tribunál Distritál Suai liuhosi julgamentu movel iha Distritu Ainaro julga arguidu ZdA ne'ebé diskunfia komete krime koasaun seksuál hasoru CdC, iha 06 Juñu 2012, iha Distritu Ainaro.

Ministériu Públiku akuza katak iha 06 Juñu 2012, arguidu ameasa no obriga lezada halo relasaun seksuál ho arguidu. Kazu ne'e akontese wainhira arguidu nia feen haruka arguidu lori lezada fila ba nia uma. Iha dalan klaran arguidu komete krime koasaun seksuál hasoru lezada.

Ministériu Públiku akuza arguidu kontra artigu 171 Kódigu Penál kona-ba koasaun seksuál ne'ebé nia moldura penal hosi tinan 2 to'o tinan 8 prizaun.

Iha prosesu julgamentu arguidu nega akuzasaun ministériu públiku katak nia la halo relasaun seksuál ho lezada maibé arguidu rei no kaer deit lezada nia hirus matan.

Faktu ne'e reforsa liutan hosi lezada ne'ebé konfirma katak sira la halo relasaun seksuál maibé arguidu so rei no kaer deit nia hirus matan.

Iha alegasaun finál, ministériu públiku husu ba tribunál atu kondena arguidu ho pena prizaun tinan 3 suspende ba tinan 4. Entretantu defeza husu ba tribunál atu fo pena ne'ebé justu no adekuada ba arguidu.

Finalmente, tribunál konklui prosesu ne'e no absolve arguidu hosi akuzasaun ministériu públiku nian tanba la iha prova sufsiente atu kondena arguidu ba krime koasaun seksuál.

13. Kazu krime violasaun seksuál - Nú. Prosesu : 93/pen/2014/TDS

Kompozisaun Tribunál : Koletivu
Juis : Dr. Alvaro Maria Freitas, Dr. Pedro Raposode
Feiguireiro & Dr. Costâncio Barros Basmery
Ministériu Públiku : Dra. Benvinda da Costa do Rosario
Defeza : Dr. Manuel Amaral (estajiaru)
Konkluzau : Absolve

Iha 25 Juñu 2014, liuhosi julgamentu movel, Tribunál Distritál Suai liuhosi julgamentu movel iha Distritu Ainaro julga kazu krime violasaun seksuál ne'ebé diskunfia involve arguidu FP hasoru LdC. Kazu ne'e akontese iha 10 Dezembru 2013, iha Distritu Same.

Ministériu Públiku akuza katak iha 10 Dezembru 2013, lezada fila hosi sosa sasan iha kios, iha dalan klaran derepentí arguidu mosu no rasta vítima ba dut laran hodi halo violasaun seksuál hasoru lezada.

Ministériu Públiku akuza arguidu kontra artigu 172 Kódigu Penál kona-ba violasaun seksuál ho nia moldura penal hosi tinan 5 to'o 15 prizaun.

Durante audiensia julgamentu arguidu deklara katak nia halo relasaun seksuál ho lezada tanba hakarak ho hakarak no la obriga. Aguidu hatutan tan katak depois remata halo relasaun seksuál, arguidu intrega osan US\$20,00 ba lezada.

Aleinde ne'e lezada mós deklara katak sira halo relasaun seksuál duni no iha momentu ne'ebá nia la hakilar no la halo reasaun ruma hasoru arguidu.

Iha alegasaun finál, ministériu públiku husu ba tribunál atu absolve arguidu hosi prosesu tomak tanba la iha prova sufsiente atu kondena arguidu. Maibé ministériu públiku husu atu arguidu selu indemnizasaun ba lezada hamutuk US\$ 2000,00.

Entretantu defeza husu ba tribunál atu absolve arguidu hosi kazu ne'e tanba arguidu la komete krime ne'e akuza ba nia.

Depoisde rona tiha alegasaun hosi parte sira, tribunál konklui prosesu ne'e no absolve arguidu tanba laiha provas sufsiente hodi kondena arguidu ba krime violasaun seksuál.

14. Kazu krime ofensa ba integridade física grave - Nú. Prosesu : 05/pen/2014/TDS

Kompozisaun Tribunál : Koletivu
Juis : Dr. Pedro R. de Figueiredo, Dr. Costâncio B. Basmery no
Dr. Argentino Luisa Nunes
Ministériu Públiku : Dra. Benvinda da Costa Rosario
Defeza : Dr. João H. de Carvalho
Konkluzau : Sei kontinua prosesu

Iha 25 Juño 2014, Tribunál Distritál Suai liuhosi julgamentu movel iha Distritu Ainaro julga arguidu AT no DdCB ne'ebé involbe iha krime ofensa ba integridade fízika grave hasoru CdS, iha 05 Agostu 2011, iha Distritu Ainaro.

Ministériu Públiku akuza katak iha 05 Agostu 2011, arguidu DdCB lori katana taa dala rua iha lezadu nia liman karuk, taa dala ida iha lezadu nia hirus matan no dala ida iha lezadu nia kabas. Agresaun ne'e rezulta lezadu sofre kanek no ran sai barak no lezadu tenke baixa iha Ospital Maubesi durante loron ida.

Enkuantu arguidu AT akompaña arguidu DdCB wainhira DdCB komete asaun hirak ne'e hasoru lezadu. Kazu ne'e akontese tanba hadau malu kintal kafe nian.

Ministériu Públiku akuza arguidu kontra artigu 146 Kódigu Penál kona-ba ofensa ba integridade fízika grave.

Iha audiensia julgamentu laran, arguidu na'in rua konfesa sira ninia hahalok. Alende ne'e, lezadu kontinua mantein akuzasaun ministériu públiku no deklara katak tanba aktu hirak ne'e nia liman fuan ne'ebé arguidu taa la bele taka-loke hanesan normal. Ne'e fo impaktu ba hala'o nia servisu loron-loron nian.

Iha alegasaun finál, ministériu públiku husu ba tribunál atu kondena arguidu ho pena efetiva tinan 3 iha prizaun no selu indemnizasaun ba lezadu hamutuk US\$ 2000,00.

Defeza husu ba tribunál atu absolve arguidu husi krime ida ne'e tanba durante produsaun ba provas mosu duvida.

Depois rona tiha alegasaun final, tribunál marka fali ba iha 04 Jullu, 2014 tuku 02:30 lorokraik ho agenda rona desizaun finál.

15. Kazu krime expozisaun ka abandonu – Nú. Prosesu : 186/pen/2014/TDS

Kompozisaun Tribunál	: Koletivu
Juis	: Dr. Pedro R. de Figueiredo, Dr. Costancio B. Basmery, Dr. Argentino Luisa Nunes
Ministériu Públiku	: Dra. Benvinda da Costa do Rosario
Defeza	: Dr. João H. de Carvalho
Konkluzau	: Sei kontinua prosesu

Iha 25 Juño 2014, Tribunál Distritál Suai liuhosi julgamentu movel iha Distritu Ainaro julga arguida DM ne'ebé komete krime expozisaun ka abandonu hasoru nia oan rasik, ne'ebé akontese 02 Juño 2012, iha Distritu Ainaro.

Ministériu Públiku akuza katak iha 02 Juño 2012, maizumenus iha oras tuku 04:00 lorokraik, arguida ba partus iha kafe laran no husik tiha bebe ne'ebéne'e iha kafe laran. Tanba husik hela bebe ne'e asu tata mate tiha bebe refere. Kazu ne'e akontese tanba mane ne'ebé fo oan ba lezada lakohi atu responsabiliza.

Ministériu Públiku akuza arguida kontra artigu 143 Kódigu Penál kona-ba expozisaun ka abandonu ne'ebé ho moldura penal hosi tinan 5 to'o 15 prizaun.

Iha prosesu julgamentu, arguida konfesa ninia hahalok no deklarata katak nia arrepende nia hahalok no promote sei la repete tan iha futuru.

Iha alegasaun finál, ministériu públiku husu ba tribunál atu kondena arguidu ho pena efetiva tinan 6, tanba arguida provadu komete duni krime ne'e. Entretantu, defeza husu ba tribunál atu fo desizaun ne'ebé justu ba arguida.

Depois rona tiha deklarasaun hosi arguidu no alegasaun final, tribunál marka fali agenda ba leitura sentensa iha 04 Jullu 2014, tuku 02:00 lorokraik.

16. Kazu krime tentativa violasaun seksuál - Nú. Prosesu : 142/pen/2014/TDS.

Kompozisaun Tribunál	: Koletivu
Juis	: Dra. Florensia Freitas. Dr. Argentino Luisa Nunes, Dr. Pedro R.de Figueredo
Ministériu Públiku	: Dra. Benvinda da Costa Rosario
Defeza	: Dr. João Henrique de Carvalho
Konkluzaan	: Kondena ho pena prizaun tinan 3 suspende ba tinan 4

Iha 25 Juñu 2014, Tribunál Distritál Suai liuhosi julgamentu movel iha Distritu Ainaro julga kazu tentativa violasaun seksuál ne'ebé involve arguidu JdS hasoru AdJ, iha Marsu 2013, iha Distritu Ainaro.

Ministériu Públiku akuza katak maisumenus iha fulan-Marsu 2013, arguidu no lezada hanesan tiun no subrinha, hela hamutuk iha uma ida. Iha lora ida, wainhira lezada toba dukur iha kuartu laran arguidu hakbesik aan ba iha lezada nia kuartu no tenta atu halo violasaun seksuál hasoru lezada. Maibe lezada halo reazem hasoru arguidu nune'e arguidu la konsege realiza nia aktu ne'e.

Ministériu Públiku akuza arguidu kontra artigu 172 Kódigu Penál kona-ba violasaun seksuál konjuga ho artigu 23 kona-ba tentativa.

Iha prosesu julgamentu arguidu konfesa nini hahalok no deklarata katak nia arrepende nia hahalok no promote sei la repete tan iha futuru.

Arguidu mós deklarata katak problema ne'e rejolve ona tuir adat no intrega ona tais 1, fahi 1 no osan hamutuk US\$150,00 ba família lezada.

Iha parte seluk, lezada mos konfirma faktu sira akuzasaun maibe deklarata katak arguidu la konsege halo relasaun seksuál ho nia tanba nia tebe hasoru arguidu.

Iha alegasaun finál, ministériu públiku husu ba tribunál atu kondena arguidu ho pena prizaun tinan 3 suspende ba tinan 4. Entretantu defeza husu ba tribunál atu fo pena ne'ebé justu no adekuada ba arguidu.

Iha 27 Juño 2014, tribunál konklui prosesu ba kazu no hodi kondena arguidu ho pena prizaun tinan 3 suspende ba tinan 4.

17. Kazu krime abuza seksuál ba menòridade - Nú. Prosesu : 57/pen/2014/TDS

Kompozisaun Tribunál	: Koletivu
Juis	: Dr. Pedro R. de Figueredo, Dr. Costancio B. Basmary, Dr. Argentino Luisa Nunes
Ministériu Públiku	: Dra. Benvinda da Costa Rosario
Defeza	: Dr. Manuel Amaral (estajiaru)
Konkluzau	: Sei kontinua prosesu

Iha 26 Juño 2014, Tribunál Distritál Suai liuhosi julgamentu movel iha Distritu Ainaro hala'o prosesu julgamentu ba kazu abuza seksuál ba menòr ne'ebé involve arguidu ABM hasoru SdS ne'ebé ho idade tinan 7 iha 08 Abril 2007, iha Distritu Ainaro.

Ministériu Públiku akuza katak iha 08 Abril 2007, arguidu ba iha lezada nia uma no obriga lezada halo abuzu ba seksuál ba lezada.

Ministériu Públiku akuza arguidu kontra artigu 290 versikulu (2) Kódigu Penál Indonezia kona-ba abuzu seksual hasoru ema ne'ebé seidak tinan 15.

Iha audiensia julgamentu arguidu nega akuzasaun ministériu públiku no deklarata katak nia kous no rei lezada nu'udar nia alin no la halo violasaun seksuál hasoru lezada. Arguidu mós hatutan katak kazu ne'e sira rezolve ona tuir adat timor nian hodi intrega karau 1 no osan hamutuk US\$150,00 ba família lezada.

Iha parte seluk, lezada kontinua konfirma faktu sira iha akuzasaun ministériu públiku nian. Maske nune'e, iha julgamentu laran lezada deklarata katak nia perdua arguidu maibe husu ba arguidu atu labele repete tan iha futuru.

Testemuña MSdA depoimentu katak nia la hare ho matan akontesimentu krime ida ne'e no iha ikus nia hatene hosi lezada.

Iha alegasaun finál, ministériu públikú husu ba tribunál atu kondena arguidu ho pena prizaun tinan 3 tuir Kódigu Penál Indonezia. Entretantu hosi parte defeza husu ba tribunál atu aplika pena mais adekuda ba arguidu.

Depois rona tiha deklarasaun hosi arguidu, depoimentu lezada no alegasaun final, tribunál marka fila fali ba iha 04 Jullu 2014, tuku 02:30 lorokraik ho agenda desizaun finál.

18. Kazu krime expozisaun ka abandonu – Nú. Prosesu : 75/pen/2014/TDS

Kompozisaun Tribunál	: Koletivu
----------------------	------------

Juis : Dr. Argentino Luisa Nunes, Dr. Pedro R. de Figueiredo,
Dra. Florensia Freitas
Ministériu Públiku : Dra. Benvinda da Costa do Rosario
Defeza : Dr. João H. de Carvalho
Konkluzau : Sei kontinua prosesu

Iha 26 Juñu 2014, Tribunál Distritál Suai hala'o prosesu julgamentu ba kazu expozisaun ka abandonu ne'ebé involve arguida CM hasoru nia oan rasik iha 01 Marsu 2011, iha Distritu Ainaro.

Ministériu Públiku akuza katak iha 01 Marsu 2011, arguida ba partus iha duut laran no soe ka husik hela bebe ne'e. Tanba ne'e, asu tata tiha bebe nia kidun. Maske nune'e, bebe konsege salva hosi DM no lori kedas ba iha ospital Maubisse hodi hetan tratamentu saúde. Agora dadaun DM foti tiha bebe ne'e hanesan ba nia oan hakiak. Kazu ne'e akontese tanba mane ne'ebé fo oan ba lezada lakohi responsabiliza bebe ne'e.

Ministériu Públiku akuza arguidu kontra artigu 143 Kódigu Penál kona-ba expozisaun ka abandonu ho moldura penal hosi tinan 5 to'o 15 prizaun.

Iha prosesu julgamentu, arguida konfesa ninia hahalok no deklarata katak nia arrpende nia hahalok no promote katak sei la repere tan iha futuru.

Iha alegasaun finál, ministériu públiku husu ba tribunál atu kondena arguida ho pena prizaun tinan 3 no suspende ba tinan 4 tanba arguida konfesa katak nia komete duni krime ne'e. Defeza husu ba tribunál fo pena ne'ebé justu no adekuada ba arguida.

Depois rona tiha deklarasaun hosi arguida no alegasaun finál, tribunál marka julgamentu ba leitura sentensa iha 04 Jullu 2014 tuku 03:00 lorokraik.

19. Kazu krime abuza seksuál ba menòridade - Nú. Prosesu : 13/pen/2014/TDS

Kompozisaun Tribunál : Koletivu
Juis : Dr. Alvaro Maria Freitas, Dr. Pedro R. de Figueiredo, Dr.
Costancio B. Basmerly
Ministériu Públiku : Dra. Benvinda da Costa Rosario
Defeza : Dr. Manuel Amaral (estajiaru)
Konkluzau : Sei kontinua prosesu

Iha 26 Juñu 2014, Tribunál Distritál Suai liuhosi julgamentu movel iha Distritu Ainaro julga kazu abuza seksuál ba menòr ne'ebé involve arguidu AL hasoru LB, iha 04 Abril 2011, iha Distritu Ainaro.

Ministériu Públiku akuza katak iha 04 Abril 2011, wainhira lezada toba dukur iha nia uma, arguidu tama ba iha lezada nia kuartu hodi halo abuza seksuál hasoru lezada.

Ministériu Públiku akuza arguidu kontra artigu 177 Kódigu Penál kona-ba abuza seksuál ba menór ho moldura penal hosi tinan 5 to'o tinan 15 prizaun.

Iha prosesu julgamentu, arguidu konfesa ninia hahalok no deklarata katak kazu ne'e sira resolve ona tuir kustume Timor nian hodi entrega karau 2 no belak 1 ba família lezada.

Iha parte seluk, lezada kontinua konfirma faktu sira ne'ebé deskreve ona iha akuzasaun ministériu públiku nian.

Iha alegasaun finál, ministériu públiku husu ba tribunál atu kondena arguidu ho pena prizaun tinan 3 no suspende ba tinan 4. Entretantu defeza husu ba tribunál atu aplika pena suspensaun ba arguidu.

Depois rona tiha deklarasaun hosi arguidu, depoimentu hosi lezada no alegasaun final, tribunál marka fali julgamentu ba leitura sentensa iha 04 Jullu 2014, tuku 03:30 lorokraik.

20. Kazu krime violasaun seksuál - Nú. Prosesu : 166/pen/2012/TDS

Kompozisaun Tribunál	: Koletivu
Juis	: Dr. Costáncio Barros Basmerly, Dr. Alvaro Maria Freitas, Dr. Pedro R. Feiguireido
Ministériu Públiku	: Dra. Benvinda da Costa do Rosario
Defeza	: Dr. Manuel Amaral (estajiaru)
Konkluzau	: Absolve

Iha 26 Juñu 2014, Tribunál Distritál Suai liuhosi julgamentu movel iha Distritu Ainaro julga kazu krime violasaun seksuál ne'ebé involve arguidu AQ hasoru JB, iha 20 Maiu 2011, iha Distritu Ainaro.

Ministériu Públiku akuza katak iha 20 Maiu 2011, arguidu ba iha lezada nia eskola no tula lezada fila. To'o iha dalan klaran arguidu lori lezada ba iha to'os laran hodi halo violasaun seksuál hasoru lezada.

Ministériu Públiku akuza arguidu kontra artigu 172 Kódigu Penál kona-ba violasaun seksuál ho nia moldura penal hosi tinan 5 to'o 15 prizaun.

Iha prosesu julgamentu arguidu nega akuzasaun hosi ministériu públiku katak nia la halo violasaun seksuál hasoru lezada.

Iha parte seluk lezada deklarata katak sira halo duni relasaun seksuál maibé tanba lezada laiha koñesimentu kona-ba krime refere, nune'e, lezada la halo asaun ruma hasoru arguidu.

Testemuña MB depoimentu katak nia la hare ho matan kona-ba akontesimentu ne'e maibé lezada konta ba nia wainhira arguidu nia feen baku lezada no ho tudik atu sona lezada.

Iha alegasaun finál, ministériu públiku no defeza husu ba tribunál atu absolve arguidu husi prosesu ne'e tanba akuzasaun la provadu.

Bazeia ba faktu sira ne'ebé produz durante julgamentu, tribunál konklui prosesu ne'e no absolve kazu ne'e tanba la iha provas sufsiente atu kondena arguidu.

21. Kazu krime danu agravadu - Nú. Prosesu : 85/pen/2014/TDS

Kompozisaun Tribunál	: Koletivu
Juis	: Dr. Costáncio Barros Basmery, Dr. Argentino Luisa Nunes, Dr. Pedro R. de Feiguireido
Ministériu Públiku	: Dra. Benvinda da Costa Roasrio
Defeza	: Dr. Manuel Amaral (estajiaru)
Konkluzau	: Adia

Iha 27 Juñu 2014, Tribunál Distritál Suai liuhosi julgamentu movel iha Distritu Ainaro adia prosesu julgamentu ba kazu danu agravadu ne'ebé involve arguidu JP hasoru Estadu. Kazu ne'e akontese iha Distritu Ainaro.

Tribunál halo adiamentu ba prosesu kazu ne'e tanba arguidu la marka prezensa mesmu tribunál notifika ona. Tribunál marka fila fali prosesu julgamentu ba iha 29 Jullu 2014, tuku 09:30 dader.

22. Kazu krime pekulatu - Nú. Prosesu : 232/pen/2014/TDS

Kompozisaun Tribunál	: Koletivu
Juis	: Dr. Pedro R. de Feiguireido, Dr. Costáncio Barros Basmery, Dr. Argentino Luisa Nunes
Ministériu Públiku	: Dra. Benvinda da Costa Roasrio
Defeza	: Dr. Manuel Amaral (estajiaru)
Konkluzau	: Adia

Iha 27 Juñu 2014, Tribunál Distritál Suai liuhosi julgamentu movel iha Distritu Ainaro adia prosesu julgamentu ba kazu pekulatu ne'ebé involve arguidu FM ho VdJN hasoru Estadu. Kazu ne'e akontese iha Distritu Ainaro.

Tribunál halo adiamentu ba prosesu kazu ida ne'e tanba arguidu la marka prezensa mesmu tribunál notifika ona. Tribunál adia prosesu julgamentu ba kazu ida ne'e ba iha 29 Outubru 2014, tuku 02:00 lorokraik.

23. Kazu krime ofensa ba integridade física simples – Nú. Prosesu : 101/pen/2014/TDS

Kompozisaun Tribunál	: Singulár
----------------------	------------

Juis : Dr. Pedro R. de Feigueireido
Ministériu Públiku : Dr. Antonio da Silva Tavares
Defeza : Dr. Manuel Amaral (estajiariu)
Konkluzau : Omologa

Iha 27 Juñu 2014, Tribunál Distritál Suai liuhosi julgamentu movel iha Distritu Ainaro adia prosesu julgamentu ba kazu ofensa ba integridade fizika simples ne'ebé involve arguidu AdcM hasoru lezadu PdcN. Kazu ne'e akontese iha 18 Fevereiru 2014, iha Distritu Ainaro.

Iha prosesu laran, arguidu no lezada konkorda atu dada fila fali kazu ne'e. Tanba arguidu promete katak sei selu indemnizasaun US\$200,00 ba lezada. Bazeia ba akordu hosi parte sira, tribunál konklui prosesu ne'e no omologa kazu ne'e.

24. Kazu krime inséndiu - Nú. Prosesu : 104/pen/2014/TDS

Kompozisaun Tribunál : Koletivu
Juis : Dr. Alvaro Maria Freitas, Dr. Pedro R. de Feigueireido,
Dr. Argentino Luisa Nunes
Ministériu Públiku : Dra. Benvinda da Costa Roasrio
Defeza : Dr. Manuel Amaral (estajiariu)
Konkluzau : Adia

Iha 27 Juñu 2014, Tribunál Distritál Suai liuhosi julgamentu movel iha Distritu Ainaro adia prosesu julgamentu ba kazu insendiu ne'ebé involve arguidu JQ hasoru LS, ne'ebé akontese iha Distritu Ainaro.

Tribunál adia prosesu kazu ne'e tanba arguidu la marka prezensa mesmu antes tribunál notifika ona arguidu. Tanba ne'e, tribunál marka fila fali prosesu julgamentu ba iha 29 Outubru 2014, tuku 02:00 lorokraik.

25. Kazu krime inséndiu - Nú. Prosesu : 52/pen/2014/TDS

Kompozisaun Tribunál : Koletivu
Juis : Dra. Florensia Freitas, Dr. Argentino Luisa Nunes, Dr.
Pedro R. de Figueiredo
Ministériu Públiku : Dra. Benvinda da Costa Roasrio
Defeza : Dr. Manuel Amaral (estajiariu)
Konkluzau : Adia

Iha 27 Juñu 2014, Tribunál Distritál Suai liuhosi julgamentu movel iha Distritu Ainaro mos kontinua adia prosesu julgamentu ba kazu inséndiu ne'ebé involve arguidu MAO, ACR ho DQ hasoru CC ne'ebé akontese iha Distritu Ainaro.

Hanesan mos kazu sira seluk iha leten, tribunál adia prosesu ne'e tanba arguidu sira la marka prezensa mesmu tribunál notifika ona. Tanba ne'e, tribunál marka fali prosesu julgamentu ba iha 30 Outubru 2014, tuku 02:00 lorokraik.

Atu hetan informasaun kle'an favor kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
telefone: 3323883/77295795
webiste: www.jsmp.tl
facebook www.facebook.com/timorleste.jsmp
twitter: @JSMPtl